

Cyngor defnyddiol ar gyfer gwneud ceisiadau am grantiau

Mae cyflwyno achos cadarn dros gymorth drwy gyflwyno cais am grant sydd wedi'i ysgrifennu'n dda yn hanfodol ar gyfer unrhyw sefydliad sy'n chwilio am gyllid.

Rydym yn rheoli amrywiaeth eang o raglenni sy'n buddsoddi mewn atgyfnerthu cymunedau.

Mae ein grantiau yn cydnabod rôl ysbrydoledig grwpiau cymunedol, prosiectau ac elusennau yn y gwaith o nodi a diwallu anghenion lleol.

Rydym hefyd yn dyfarnu grantiau addysgol ac ysgoloriaethau.



Darllenwch y wybodaeth am y gronfa yn ofalus

Bydd gan bob Cronfa ei meini prawf unigol ei hun a fydd yn esbonio ei nodau, pwy sy'n gallu gwneud cais a beth y gallwch wneud cais amdano. Byddwch yn onest i'ch sefydliad a'ch buddiolwyr drwy wneud cais am brosiect y mae gan eich sefydliad y gallu i'w gyflwyno.

Gwnewch yn siŵr fod gennych drefniadau llywodraethu da

Rydym yn edrych ar y sefydliad gymaint ag ydym yn edrych ar y prosiect. Mae dogfennau llywodraethu yn cynnwys y wybodaeth graidd am eich sefydliad a dylai'r dogfennau hyn fod yn rhai gweithredol sy'n cael eu hadolygu'n rheolaidd - dogfen lle y caiff y cynnwys ei roi ar waith - nid dogfen sy'n cael ei chadw ar silff a'i hanwybyddu.

Dogfennau allweddol yw rheolau eich sefydliad – cyfeirir atynt yn aml fel eich cyfansoddiad, eich cyfres ddiweddaraf o gyfrifon neu daflen incwm/gwariant a'ch polisi diogelu. Gweler ein taflenni cymorth ar Strwythurau Sefydliad a'r Safonau Gofynnol er mwyn bod yn Gymwys i gael Cyllid i gael rhagor o wybodaeth.

Deallwch Gronfeydd Anghyfyngedig

'Cronfeydd Anghyfyngedig' (y cyfeirir atynt weithiau fel 'Cronfeydd Rhydd') yw 'cronfeydd ariannol nad ydynt wedi'u hymrwymo ar gyfer defnydd penodol'. Mae'n arfer da a argymhellir i gael gwerth rhwng 6 a 9 mis o gostau gweithredu mewn cronfeydd anghyfyngedig a pholisi mewn perthynas â hyn.

Gallai peidio â chael unrhyw gronfeydd anghyfyngedig godi pryderon bod eich sefydliad yn annhebygol o oroesi yn y byrdymor a bod y prosiect yn anymarferol. Mae angen i ni ddeall bod eich Ymddiriedolwyr yn ymwybodol o'r risg hon ac yn cymryd camau i gynyddu lefelau'r cronfeydd anghyfyngedig yn yr hirdymor.

Gallai lefel uchel o gronfeydd anghyfyngedig awgrymu bod eich sefydliad mewn sefyllfa iach gyda llawer o arian yn y banc. Byddai'n ymddangos felly nad oes angen grant ar eich sefydliad. Dylech esbonio os yw'r cronfeydd anghyfyngedig uchel hyn yn deillio o gynilion a gafodd eu neilltuo at ddiben penodol - i brynu safle er enghraifft.

Byddwch yn onest am y ffigur hwn yn y ffurflen gais gan y gellir gwirio hyn yn eich cyfrifon blynyddol.

Dangoswch eich dealltwriaeth o'ch cymuned leol

Rydym am weld eich bod yn adnabod eich cymuned yn dda ac yn deall y problemau y mae'n eu hwynebu. Dywedwch wrthym am y problemau hyn a sut maent yn effeithio ar y bobl rydych yn gweithio gyda nhw.

Ceisiwch beidio â defnyddio ystadegau cyffredinol, mae gwybodaeth leol sy'n ymwneud â'ch ardal yn fwy realistig, ond gwnewch yn siŵr ei bod yn berthnasol i'r bobl rydych yn gweithio gyda nhw. Gwnewch yn siŵr bod eich cais yn seiliedig ar ffeithiau, peidiwch â gorliwio eich hawliad ond peidiwch chwaith â thanbriso'r gwerth rydych yn ei gynnig i gymuned.

Defnyddiwch iaith syml sy'n hawdd ei deall

Ysgrifennwch gais mewn Cymraeg neu Saesneg clir, gan osgoi defnyddio jargon a thalfyriadau. Dylech gymryd yn ganiataol na fyddwn yn gwybod am beth rydych yn sôn!

Gwnewch yn siŵr bod eich ffigurau'n gywir

Mae darparu dadansoddiad o gostau i ni yn ein helpu i weld bod y prosiect rydych yn gofyn am gyllid ar ei gyfer wedi'i gynllunio a bod pob cost wedi cael ei hystyried.

Os ydych yn gwneud cais am gyllid rhannol, ticiwch yr eitemau rydych yn gwneud cais amdanynt o'r gronfa hon a dywedwch wrthym o ble y bydd gweddill y cyllid yn dod, gan gynnwys pryd rydych yn disgwyl cael gwybod am ganlyniad y cyllid hwn.

Dangoswch i ni sut rydych yn gwybod bod angen y prosiect hwn

Esboniwch y broses rydych wedi'i dilyn er mwyn canfod bod angen y prosiect hwn.

Cofiwch gynnwys unrhyw ymgynghoriad cymunedol, unrhyw wybodaeth leol berthnasol a'r gwaith o fonitro prosiect lle mae gwaith yn mynd rhagddo.

Mae hyn yn dangos i ni eich bod wedi ystyried barn eich buddiolwyr ac wedi defnyddio'r wybodaeth honno i lywio'r prosiect rydych yn ei gynnig. Byddwch yn frwd dros eich gwaith, dywedwch wrthym pam mae eich sefydliad yn arbennig ac esboniwch pam mae eich buddiolwyr yn credu eich bod chi'n arbennig.

Cofiwch esbonio sut y byddwch yn dangos bod eich prosiect wedi bod yn llwyddiannus

Er enghraifft:

- Cynnydd mewn aelodaeth o X i Y dros 12 mis.
- Adborth ffurfiol drwy ddau holiadur ar ddechrau ac ar ddiwedd y prosiect.
- Clipiau fideo sy'n dangos barn y buddiolwyr.
- Adborth gan drydydd parti megis athrawon, cymdogion neu rieni.

Dywedwch wrthym mor glir â phosibl ar beth yr hoffech wario'r cyllid

Er enghraifft: byddwn yn cyflogi tiwtor ffitrwydd am un awr unwaith yr wythnos dros 12 mis. Bydd y tiwtor yn darparu sesiynau ymarfer cyflyru ar gyfer aelodau anabl o'n tîm pêl-fasged cadair olwyn sy'n cyfarfod dwywaith yr wythnos yn y ganolfan hamdden. Mae gan y clwb 15 o aelodau ar hyn o bryd.

Gofynnwch am safbwynt allanol

Yn olaf, gofynnwch i rywun nad yw'n gyfarwydd â'r prosiect na'r sefydliad i ddarllen y cais cyn i chi ei gyflwyno – os yw'n deall yr hyn rydych yn ei gynnig, rydych bron yno.